

元氏長慶集

冊五

THE NEW YORK PUBLIC LIBRARY
ASTOR LENOX TILDEN FOUNDATION

1891

元氏長慶集卷第三十七

狀

彈奏劍南東川節度使狀

彈奏山南西道兩稅外草狀

彈奏劍南東川節度使狀

劍南東川詳覆使

故劍南東川節度觀察處置等使嚴礪在任日擅沒管內將士
官吏及百姓前資寄住等莊宅奴婢今於兩稅外加配錢米及
草等謹件如後

嚴礪擅籍沒管內將士官吏百姓及前資寄住塗山甫等八十八戶
莊宅共一百二十二所奴婢共二十七人並在諸州項內分析

右臣伏准前後制勅令出使御史所在訪察不法具狀奏聞臣昨奉
三月一日敕令往劍南東川詳覆瀘川監官任敬仲贓犯於彼訪聞

嚴礪在任日擅沒前件莊宅奴婢等至今月十七日詳覆事畢追得所沒莊宅奴婢文案及執行案典耿琚馬元亮等檢勘得實據嚴礪元和二年正月十八日舉牒稱管內諸州應經逆賊劉闢重圍內并賊軍到處所有應接及投事西川軍將州縣官所由典正前資寄住等所犯雖經霈澤莊田須有所歸其有莊宅奴婢桑柘錢物斛斗邸店碾磴等悉皆搜檢得塗山甫等八十八戶案內並不經驗問虛實亦不具事職各便收家產沒官其時都不聞奏所收資財奴婢悉皆貨賣破用及配充作坊驅使其莊宅桑田元和二年三年租課嚴礪並已徵收支用訖臣伏准元和元年十月五日制西川諸州諸鎮刺史大將及參佐官吏將健百姓等應被脅從補署職掌一切不問又准元和二年正月二日敕文自今日已前反逆緣坐並與洗滌况前件人等悉是東川將吏百姓及寄住衣冠與逆黨素無管屬賊軍奄至暫被脅從狂寇既平再蒙恩蕩嚴礪公違詔命苟利資財擅破八

十餘家曾無一字聞奏豈惟剝下實謂欺天其莊宅等至今被使司收管臣訪聞本主並在側近控告無路漸至流亡伏乞聖慈勒本道長吏及諸州刺史招緝疲人一切却還產業庶使孤窮有托編戶再安其本判官及所管刺史仍乞重加貶責以絕姦欺

嚴礪又於管內諸州元和二年兩稅錢外加配百姓草共四十一萬四千八百六十七束每束重一十一斤

右臣伏准前後制敕及每歲旨條兩稅留州留使錢外加率一錢一物州府長吏並同枉法計贓仍令出使御史訪察聞奏又准元和三年赦文大辟罪已下蒙恩滌蕩惟官典犯贓不在此限臣訪聞嚴礪加配前件草准前日月追得文案及執行案典姚孚檢勘得實據嚴礪元和二年七月二十一日舉牒稱管內郵驛要草於諸州秋稅錢上每貫加配一束至三年秋稅又准前加配計當上件草臣伏准每年旨條館驛自有正料不合於兩稅錢外擅有加徵况嚴礪元和三年

年舉牒已云准二年舊例徵收必恐自此相承永使疲人重困伏乞
勒本道長吏嚴加禁斷本判官及刺史等伏乞准前科責以息誅求
嚴礪又於梓遂兩州元和二年兩稅外加徵錢共七千貫文米共五
千石

右臣准前月日追得文案及執行案典趙明之檢勘得實據嚴礪元
和二年六月舉牒稱綿劍兩州供元和元年北軍頓遞費用倍多量
於梓遂兩州秋稅外加配上件錢米添頓綿劍兩州頓遞費用者臣
又牒勘綿州得報稱元和二年軍資錢米悉准舊額徵收盡送使訖
並不曾交領得梓遂等州錢米添填頓遞亦無剋折當州錢米處者
臣又牒勘劍州得報稱元和元年所供頓遞侵用百姓腹內兩年夏
稅錢四千二十三貫三文使司令於其年軍資錢內剋下訖其米卽
用元和元年米充並不侵用二年軍資米數使司亦不曾支梓遂州
錢米充填者臣伏念綿劍兩州供頓自合准敕優矜梓遂百姓何辜

擅令倍出租賦况所徵錢米數內惟尅下劍州軍資錢四千二十三貫三文其餘錢米並是嚴礪加徵別有支用其本判官及遂州刺史悉合科處以例將來擅收沒塗山甫等莊宅奴婢及於兩稅外加配錢米草等本判官及諸州刺史各銜并所收色目謹具如後

擅收沒奴婢莊宅等元舉牒判官度支副使檢校尙書刑部員外郎兼侍御史賜緋魚袋崔廷

都計諸州擅沒莊共六十三所宅四十八所奴一十人婢一十七人於管內諸州元和二年三年秋稅錢外隨貫加配草元舉牒判官觀察判官殿中侍御史內供奉盧翹

都計諸州共加配草四十一萬四千八百六十七束

加徵梓遂兩州元和二年秋稅外錢及米元舉牒判官攝節度判官監察御史裏行裴誨

計兩州加徵錢共七千貫文米共五千石

梓州刺史檢校尚書左僕射兼御史大夫嚴礪元和四年三月八日身亡

擅收塗山甫等莊二十九所宅四十一所奴九人婢一十七人加徵三千貫文米二千石草七萬五千九百五十三束元和二年三萬一千七百九十二束

遂州刺史柳蒙

擅收沒李簡等莊八所宅四所奴一人加徵錢四千貫文米三千石草四萬九千五百三十五束元和二年二萬四千五百三束元和三年二萬五千四百八十二束

綿州刺史陶鎰

擅收沒文懷進等莊二十所宅十三所加徵草八萬八千六百八十八束元和二年三萬八千九百九十三束元和三年五萬五千九百九十五束

劍州刺史崔實成元和二年十一月五日改授邛州刺史

擅收沒鄧琮等莊六所加徵草二萬一千八百七十七束元和二年九千三十

九東元和三年一萬
二千七百七十八束

普州刺史李忭

元和二年加徵錢草六千束三年加徵草九千四百五十束

合州刺史張平

元和二年加配草三千四百六十二束三年加徵草五千六百五束

榮州刺史陳當

元和二年加徵草九千四百三束三年加徵草五千四百二十七束

渝州刺史邵膺

元和二年加徵草二千六百一十四束三年加徵草二千七百二十

七束

瀘州刺史兼御史劉文翼

元和二年加徵草三千八百五十三束三年加徵草三千八百五十

一束

資州元和二年加徵草一萬五千七百九十八束三年一萬六千二百二十五束

簡州元和二年加徵草二萬四千一百四束三年二萬三千一百一十八束

陵州元和二年加徵草二萬四千六百六束三年二萬三千八百六十一束

龍州元和二年加徵草八百九十一束三年八百一十一束

右已上本判官及刺史等名銜并所徵收色目謹具如前其資州等四州刺史或緣割屬西川或緣停替遷授伏乞委本道長吏各據徵收年月具勘名銜聞奏

以前件狀如前伏以聖慈軫念切在蒼生臨御五年三布赦令殷勤曉諭優惠困窮似涉擾人頻加禁斷况嚴礪本是梓州百姓素無才行可稱久在兵間過蒙獎拔陛下錄其微効移鎮東川杖節還鄉寵

光無比固合撫綏黎庶上副天心蠲減征徭內榮鄉里而乃橫徵暴賦不奉典常擅破人家自豐私室訪聞管內產業阡陌相連童僕資財動以萬計雖卽沒身謝咎而猶遺患在人謂宜諡以醜名削其褒贈用懲不法以警將來其本判官及諸州刺史等或苟務容軀競謀侵削或分憂列郡莫顧詔條但受節將指撝不懼朝廷典憲共爲蒙蔽皆合痛繩臣職在觸邪不勝其憤謹錄奏聞伏候勅旨中書門下牒御史臺

牒奉勅籍沒資財不明罪犯稅外科配豈顧章程致使銜冤無由仰訴不有察視孰當舉明所沒莊宅奴婢一物已上並委觀察使據元沒數一一分付本主縱有已貨賣破除者亦收贖却還其加徵錢米草等亦委觀察使嚴加禁斷仍榜示村鄉使百姓知委判官崔廷等名叨參佐非道容身刺史柳蒙等任竊藩條無心守職成此弊政害及平人撫事論情豈宜免戾但以罪非首坐法合會恩亦有恩後加

徵又已去官停職俾從寬宥重此典常其恩後加徵草及柳蒙陶鎗李忭張平邵膺陳當劉文翼等宜各罰兩月俸料仍書下考餘並釋放牒至准敕故牒

彈奏山南西道兩稅外草狀

山南西道管內州府每年兩稅外配率供驛禾草共四萬六千四百七十七圍每圍重二十斤

興元府二萬圍內五千圍每年折徵價錢充使司雜用每圍一百二十文據元和三年使牒減免不徵餘一萬五圍見徵率

洋州一萬五千圍

利州一萬一千四百七十七圍

右訪聞前件州府每年兩稅外加配驛草遂於路次州縣檢勘文案據諭後使牒並稱准舊例於兩稅外科配又牒山南西道觀察處置等使裴玢勘得報稱自建中元年已後每年隨稅據貫配率前件禾

草將供驛用者伏准元和元年已後三度敕文每年旨條兩稅留州留使錢外加率一錢一物州府長吏並以枉法贓論又准今年二月三日制節文諸道兩稅外摧率比來制敕處分非不丁寧如聞或未遵行尙有欺弊永言奉法事理當然申敕長吏明加禁斷如刺史承使牒於界內權率明加懲責仍委御史臺及出使郎中官御史訪察聞奏者伏以前件草並是兩稅外徵率准制合勒本道明

州府長吏仍令節級科處分勘責得實以前劍南東川詳覆使監察御史元稹奏謹具如前

中書門下牒御史臺

牒奉勅積習多年成此乖越然在長吏合尋根由循失政之規置無名之稅雖原情可恕而在法宜懲觀察使宜罰一月俸刺史各罰一季俸仍令自元和四年已後禁斷牒至准敕故牒

元氏長慶集卷第三十七

元氏長慶集卷第三十八

狀

論浙西觀察使封杖決殺縣令事

論轉牒事

爲河南百姓訴車

同州奏均田

當州兩稅地

論浙西觀察使封杖決殺縣令事

浙西觀察使潤州刺史韓臯去年七月封杖決湖州安吉縣令孫澥四日致死

右御史臺奏得東臺狀訪聞有前件事先牒湖州勘得報稱孫澥先準使牒差攝烏程縣令日判狀追村正沈拙不出正帖不用印奉觀察使七月十六日牒決孫澥臂杖十下仍差衙前虞候安士文監決第三等杖二十二日安士文到科決孫澥官忝字人一邑父母白狀追攝過犯絕輕科罰所施合是本州刺史且觀察使職在六條訪察

事有不法卽合具狀奏聞封杖決人不知何典數日致死又託以痢疾爲念冤魂有傷和氣其湖州刺史受命專城過於畏懦受使司軍將科決縣令致死寢而不言並請准科以明典憲其諸道觀察使輒封杖決巡內官吏典法無文伏望嚴加禁斷庶使遐方士子免有銜冤

敕封杖決人殊非文法因此致死有足矜嗟韓臯備歷中外合遵典憲有此乖越良所憮然罰一月俸料據決孫澥月日是舊刺史辛祕離任之後新刺史范傳正未到之時俱無愆尤不可議罰餘依

論傳牒事

據武德軍節度使王紹六月二十七日違敕擅牒路次州縣館驛供給當道故監軍孟昇進喪柩赴上都句當部送軍將官健驢馬等轉牒白一道謹具如前又得東都都亭驛狀報前件喪柩人馬等準武寧軍節度轉牒祇供今月二十三日未時到驛宿者伏準前後制敕

入驛須給正券並無轉牒供擬之例况喪柩私行不合擅入館驛停止及給遞乘人夫等當時追得都句當押衙趙伋到責狀稱孟監軍去六月十四日身亡至七月五日蒙本使差押領神柩到上都領得轉牒累路州縣並是館驛供熟食草料人夫牛等又狀稱其監軍只是亡日聞奏更不別奏只是本使僕射發遣亦別無敕追者謹檢興元元年閏十月十四日敕應緣公事乘驛一切合給正券比來或聞諸州諸使妄出食牒煩擾館驛自今已後除門下省東都留守及諸州府給券外餘並不得輒入館驛宜委諸道觀察使及所在州縣切加促捕如違犯請資官所在勒留具名聞奏餘並量事科決仍具給牒所由牒中書門下者又准元和二年四月十五日敕節文諸道差使赴上都奏事及押領進奉官并部領諸軍防秋軍資錢物官及邊軍合於度支請受軍資糧料等官並在給券餘並不得給如違本道專知判官錄事參軍並準興元元年十二月十七日敕處分者謹詳